

文獻叢編

第四輯

文獻卷

卷之三

中華民國二十年四月出版

文獻叢編第十輯

編輯所

故宮博物院

發行所

電話東局一六〇九

印刷所

和平門內後

細瓦廠

必究
翻印

郵費		表目價		每月一冊	半年六冊	全年十二冊
每期	一分	本埠	外埠			
		二元七角	五元二角			
		外埠	國			

本市 上海 天津各大書店均有代售

像 正 雍



單 貢 表 押 喀 爾 廓

पञ्चविंश
 तासथान १
 मुगाएकसदनी
 दानाकोमाला १
 कीपपावथान २
 होहुषावनातताषा १
 जट्टदवनातताषा ४

چاس طائی یک اور جان دار پنجه
 تسان رہ یک رہ
 کیچا قبے یک تسان دو قبه بات طاقہ
 یک رہ
 زر بات طاقہ پار
 بھرائی نذر ترسیل است بنظر مبارک خواہ کشت

原件長三十三分公寬十二分公公十二分

文獻叢編第四輯目錄

雍正像

廓爾喀押表貢單

康熙建儲案

清世宗關於佛學之諭旨 續

戴鐸口供

乾隆朝文字獄 劉嶶刷賣「聖諱實錄」案

徐乾學等被控案 康熙二十九年至三十一年

康熙建儲案

案清康熙十四年立允礪爲太子四十七年九月廢四十八年三月復立五十二年十月又廢禁錮於咸安宮諭云後若有奏請皇太子已經改過從善應當釋放者朕即誅之至五十二年二月趙申喬奏請冊立太子諭以皇太子事未可輕定將原摺發還五十六年十一月大學士王掞及御史陳嘉猷等八人又密疏奏請建儲諭掞等勿爲名起見五十七年正月翰林院檢討朱天保疏請復立允礪康熙御行宮正門親問天保語及其父都納天保斬決六十年慶賀元旦典禮王掞又具摺復請建儲御史陶彝陳嘉猷等十人亦會銜上疏同年三月康熙手諭諸王大臣斥之羣臣請議王掞等罪奉旨發往西陲効力時掞年已七十由其子奕清代往雍正即位關於建儲事改書密封不預公布元年八月一日諭云建儲一事理宜夙定去年十一月之事倉卒之間一言而定聖祖神聖非朕所及今朕親寫密封緘置錦匣藏於正大光明匾額之後諸卿其識之至乾隆時又著古今儲貳金鑑一書

行世今檢懋勤殿檔有王掞奏請建儲原摺四件陳嘉猷等原摺二件照錄

于下

王掞摺一

臣王掞謹奏欽惟我皇上以仁敬慈孝之身備修齊治平之道始於家邦迄於四海無一物之不得其所無一事之不協於中治具畢張人民和樂眞足以固萬年之根本樹億穰之儀型自唐虞三代以來治化之隆未有如今日者也惟是儲位一事虛懸日久迄今未定仰見我皇上慎重之心深遠之慮將以規畫盡善付托萬全然臣嘗伏念懋建元良從古所重歷考前代之紀無不以國本素定而乂安而老成謀國亦無不以元子早建爲急務當明神宗朝臣之先臣錫爵職任宰輔時以儲位未定先後瀝疏或公籲或獨奏或鶻言或密揭凡三十餘上卒以回疑貳之心而息紛紜之論儲位既定內外晏如臣每循覽家乘捧先臣奏牘未嘗不歎先臣忠悃之獲伸而感悟之深切也但先臣未遇堯舜之主故不能以片言立決必待反覆陳奏而後得當今臣遭逢皇上聖明凡百

措施度越前代每見皇上於家國事宜雖至纖微無不計慮久遠處置明備況儲位之重乎臣知皇上聖鑒必已素定於中特有待而後發是以臣雖叨沐洪恩擢任機務五載於茲未嘗一言及之非以緘口避嫌實謂此事當出自乾斷無俟臣等之置喙也今天下喁喁引領待命已歷數年愚賤之心未能咸知聖意臣每伏見皇太后春秋漸高含飴之愛燕翼之心懸望切至每歲恭遇皇上萬壽普天率土黃童白叟皆得匍匐來京呼嵩祝華而宮庭戲綵之下主器者末由申孺慕之誠臣心每爲怒然且以臣之庸愚叨荷國恩全家蒙福每佳辰令節父子祖孫團聚一室因以感頌皇上錫類之仁被於臣下者猶如此况我皇上身爲天下之主富有四海之大而於家庭父子之樂顧不欲其萬全而無遺憾乎伏願皇上深念國本之重察德慧福澤之所鍾念困心衡慮之已久手頒詔諭早定儲位則宗社幸甚臣民幸甚臣漢人也於皇上家事未能深悉而羣情向背察之已審皇上臣民之天也天意所屬人心自服人心即天心也臣賦性愚魯歷官五十年臣惟知有皇上耳凡聖子神孫臣皆未嘗一通姓氏臣

今日之言初非有所攀附以希後日之寵利但念國本重大實係千秋萬世之
至計久安長治之鴻基且見一月以來雨澤偶愆上廑睿懷屢頒諭旨下詢政
事闕失伏思聖政日隆聖德日懋反覆思維無可置議或惟此聖心默運之際
自足以感召天和故敢瀝忱密奏以瀆聖聽臣衰老多病前歲蒙皇上天地之
恩得以再生然衰憊之狀日甚一日向欲靜候皇上之裁定故遲之又久未敢
妄陳今臣衰病日加偷朝露猝至有懷未吐則上負皇上知遇之隆下背先臣
忠盡之訓其何以自立於天地爲此昧死上陳伏候聖鑒皇上倘俯賜採錄即
見施行則如陽和一照羣翳自消眞天下之福或聖意尙須深籌熟計大典舉
行有待伏望皇上鑒臣愚忠曲賜保全萬勿宣露臣言以貽臣後日之隱禍則
臣生生世世感高厚之恩於無窮矣臣不勝惶悚待罪之至臣謹奏臣姪孫監
生臣王楷繕寫

王掞摺二

臣王掞謹奏本月十六日臣家人齋回欽賜御書匾額二幅臣曾祖王錫爵懋

勸貽範臣父王時敏篤行通才臣恭設香案謹率闔家子姓除臣子詹事臣王奕清現在熱河外臣姪休致檢討臣王遵辰臣姪孫編修臣王慕候補員外臣王瞻舉人臣王狃臣孫恩蔭生臣王懷等望闕叩頭祇領訖臣隨張掛堂上盡日瞻仰伏覩皇上筆力雄勁結法森嚴神采煥發乎毫端鋒穎直透於紙背皆由聖躬康泰故能以萬幾之暇豫發越於揮毫以乾健之精神流露於翰墨萬壽無疆於茲益信臣感激之下懼忭實深臣伏尋繹懋勸貽範字義不惟寵褒臣祖亦即所以教勗微臣蓋臣祖秉政之日正前代弛玩之時故凡事關宗社必連章累牘苦口直陳而遷延歲月且不能諒於當日紛呶之口雖積誠所孚久之終於格正而臣祖之心力良瘁矣今臣遭逢堯舜乾剛獨運凡細事且不遺乎睿慮大事自默定於宸衷總之皇上深籌密畫迥出於羣臣思議之先謀慮之表臣雖欲展區區一得之愚亦何足仰佐高深之萬一追念臣祖是臣處其易而臣祖處其難臣祖猶將盡瘁於叔季之世而臣曾無所補報於聖明之朝今日跪捧奎章感動之餘真不禁臣之慄焉負疚悚然思奮也至於臣父雖

起自任子未登科甲而行成名立爲鄉黨所宗茲蒙錫以篤行通才則臣父之品詣文采包舉無遺此尤臣數十年廻環五內惴惴不敢仰祈亦惟恐祈之而不能得之於皇上者而今一旦得之此眞曠代之奇榮百世之盛事豈惟臣之祖父銜感於無窮實自臣之身以及臣之子姓世世所不能仰報者也臣衰耄之年深懼隕越而一月之中旣荷特賜御書詩扇對聯於前先世又蒙欽頒匾額於後聖恩稠疊於斯極矣惟有益竭踵頂之報犬馬之勞以仰答天高地厚於無既耳謹繕摺恭謝天恩臣不勝感激踴躍之至臣謹奏

王掞摺三

臣王掞謹奏本月二十五日臣蔣廷錫家人齎到諭旨一道內稱七月二十日蔣廷錫勵廷儀王圖炳奉皇上面諭王掞謝賜伊祖父匾額奏摺復言及伊祖王錫爵上疏建儲一事若論萬曆朝王錫爵相業此匾亦不應賜朕猶及見萬曆年間內侍得悉當時情事萬曆以羣臣敦請乃立泰昌泰昌平日極不能盡孝道萬曆之終亦不甚明泰昌之立不過三月足見天之報施不爽王錫爵身

爲大臣不能爲國家擇賢而立而以此爲功可乎且萬曆之時四方搆釁朝廷
多事明代之衰實由於此王錫爵旣秉國鈞豪不能調理潛消而乃以建立泰
昌一事博名後世將誰欺乎今王掞屢次陳奏皆以伊祖爲辭語言煩絮揆其
意中必有所主且不思萬曆之時紀綱淪壞所立非人以致世運日替王掞何
不願國家安泰長享昌運而乃以末季之事爲比喩耶爾等將朕旨詳悉寫錄
傳諭王掞欽此臣跪誦之下戰兢愧汗無地自容罪當萬死蒙皇上不即加重
譴猶得奉旨詳悉傳諭破臣心之愚指臣言之謬是皇上之寬弘矜諒尙賜臣
以覺悟愧悔之路也臣震驚之下感激更不欲生謹將臣奏摺煩絮之由并區
區微忱愚悃一剖露於皇上之前惟皇上鑒之兩年來恭聆皇上諭旨備悉宵
旰憂勞無一時一事可以少釋即近日御賜臣等詩扇亦有求簡逡巡多恍惚
遇煩留滯累精神之句臣因聖諭所及字字實情眞境展轉圖維求所以稍紓
皇上之憂勞者實無其道愚昧無識竊謂惟早定儲位庶幾可稍佐裁決之萬
一又念宗社大計皇上必熟籌萬全非臣下可置未議而臣之愚誠旣萌一月

以來盤旋於中夢寐不置故因事觸發情見乎詞遂致語多煩絮今蒙皇上洞見臣心益不敢更自諱匿若謂臣意中必有所主臣漢人也於皇上家事不能悉知淵衷不能仰測臣不過就經義所見緘默非臣分所宜故思効其管窺至皇上用人行政纖悉細務且歸獨斷豈有如此大事臣敢意有所主况臣蒙皇上豢養教誨小心守法素荷聖明洞察歷數五十餘年臣之祿位屢邀簡擢皇上所賜也臣之身家曲荷矜全皇上所保也臣之疾病頻賜醫藥皇上所生也而且澤被一門榮及數世今已年垂八十何反喪心病狂懷私挾詐有所偏倚此則臣萬萬不敢有是心也再臣爲臣祖王錫爵賜匾奏謝摺中語涉萬曆時事臣實白幸遭逢聖世逾於臣祖百倍而詞不達意自取罪戾又因十六日捧到御書臣正患肩背熱毒痛楚昏憒以致繕摺恭謝草率稱引臣罪奚辭若夫臣祖立朝之事臣僅習聞父兄一家之傳說至泰昌之立臣祖已去國多年而今乃誤有稱述今蒙皇上詳示萬曆泰昌兩朝情事臣如夢方覺悔已無及至於諭旨謂臣以末季爲比喩伏思今日之景運方隆實超出前古即三代以下

之治世興朝臣猶不敢引之以上媿唐虞臣即愚昧至極亦何敢以末季爲比
喻此又臣之萬萬不敢有是心也臣謹據實回奏如有一字虛飾豈惟皇上國
法寸磔所不容亦天地神明誅殛所不宥伏祈皇上速賜罷斥以爲冒昧之戒
臣不勝恐懼待罪之至臣謹奏

王掞摺四

臣王掞謹奏爲寶歷初周普天共慶謹瀝愚忱仰祈睿鑒事欽惟皇上功德邁
於百王福壽冠於千古今恭遇皇上御宇六十年海宇昇平人民和樂實由皇
上體神聖之資勤宵旰之治聖不自聖安益求安爲自古帝王之所未有此皆
有實事歷歷可徵臣非敢襲頌聖之舊文爲鋪叙之浮詞也皇上自御極以來
研究六經旁及諸史其於天人理數之微治忽得失之故無不博觀洞悉故事
至立斷皆出舉朝思慮之所不及聖學之弘深自古未有也內平三逆南收海
島西靖邊陲近更以澤旺阿喇布坦跳梁出師征討鴻謨偉略皆由宸斷大軍
捷書屢奏收復萬里之絕域武功之赫濯自古未有也出治行政則深有見於

尙書所云知人安民之難故於文臣則自縣令以上武官自千總以上皆經考試選用而外省督撫提鎮藩臬等官時加諮詢恒令陞見凡使命往來於四方之水旱必詳加垂詢以驗虛實年來更許內外大臣具摺密奏以廣見聞歷年蠲免賑恤積至數千億萬之多皆不由督撫之奏請盜賊竊發初萌即行撲滅不待中外之報聞慎用人謹天災恤民隱自古未有也八旗官兵俸餉之外設官帑以代償其私負慮完官帑之難更蠲免以蘇其困乏遇天時之炎暑則軫念犴狴之囚聞藩服之歲饑則水運陸輸徧及於朝鮮蒙古恤軍旅重民命柔遠人亦自古未有也蓋皇上身居九重之中而心思周乎四海之遠恩澤徧於窮簷蔀屋之微在廷之臣子亦遂如草木安於大造之春生夏長而以爲固然遠方之黎庶亦遂如赤子之待乳哺顧復於父母而相忘於何有此所以天佑聖明曆服綿遠迄今六十載正如日方中而未有紀極也五十九年十月二十六日廷臣公同具摺懇請六十年元旦舉行慶賀典禮於十二月十二日欽奉諭旨因念正月初七日乃世祖章皇帝忌辰自初七至二月十一以前不受行

禮而且念西陲用兵官民勞苦陝屬歲歉地震正君與臣次孜求治之時何慶賀之有廷臣再摺祈請於十二月二十八日復奉諭旨諸王大臣行禮猶屬細事所議並未見及其大者朕御宇六十年皆祖宗積德默佑之所致當親詣盛京朝謁三陵以大展祭典但今年老不能親往遣阿哥等恭代朕告祭俟上元節後朕躬詣孝陵大祭欽此臣等恭誦之下仰見皇上孝思無窮孺慕不已羣臣莫不震驚感動又皆以智識淺陋不能見及其大以仰副聖懷爲愧悚也今於二月十六日恭遇謁陵禮成皇上於承先之典可謂旣明且備旣隆且重矣而臣愚以爲皇上於啟後之計尙不能不仰煩睿慮也方今儲位尙虛海內顧願想望已非一歲五十七年臣同官馬齊松柱蕭永藻等會同廷臣合辭籲請伏思皇上之運廻慎重皆凜於天命之不易聖心早有定見臣下無庸上瀆然臣以爲皇上即天也能繫我皇上之念者即能得上天之心能承我皇上之歡者即能承上天之眷今當寶曆六十年周而復始之景運眞數千年未見之昌期倘蒙斷自宸衷煥發德音布告中外擇吉冊建元良而萬壽聖節恭請俯順